



# Communicaziun a las medias

Data

29 da fanadur 2021

---

## Convenziun da las Alps: excursiuns da velo cun uffants e giuvenils per lung da l'En

**A Samedan cumenza oz il project transcunfinal «MoVe INN now». Totalmain 80 uffants e giuvenils da l'Engiadina, dal Tirol e da la Baviera van dals 29 da fanadur fin ils 12 d'avust 2021 cun il velo per lung da l'En. Il project – organisà dal presidi svizzer da la Convenziun da las Alps – serva a far enconuscent a las participantas ed als participants l'impurtanza ecologica da quest flum alpin.**

Passa 40 uffants e giuvenils sa mettan oz en sella a Samedan per sa participar ad ina tura da velo per lung da l'En. Ensemen cun lur accumpagnadras e lur accumpagnaders èn els durant trais dis sin via. A San Niclà en Engiadina Bassa, datiers dal cunfin svizzer-austriac, cuntinuescha ina gruppa dal Tirol il viadi. Quai succeda da maniera simbolica cun surdar in bastun da staffetta.

En il rom da la tura da velo sa participeschan ils uffants ed ils giuvenils tranter auter ad in'excursiun tar ils casturs sco er ad in'excursiun al flum lateral Beverin ch'è vegnì undrà cun il label «Gewässerperle PLUS». Ultra da quai stat ina visita dal mulin a Ftan sin il program.

Cun l'excursiun da velo vul il presidi svizzer da la Convenziun da las Alps sensibilisar ils uffants ed ils giuvenils per ils ecosistems alpins e per ina mobilitad favuraivla al clima da las Alps. Il project vegn cunorganisà da la Fundaziun Pro Terra Engiadina, dal WWF Austria e da las organisaziuns da giuventetgna e sport da l'Engiadina Bassa.

Cunquai ch'ils effects da la midada dal clima e la perdita da la biodiversidad na sa ferman betg als cunfins, fai senn da collavurar stretgamain en connex cun la protecziun dals flums alpins. «MoVe INN now» vul mussar quai a maun da la staffetta da velo e promover il barat tranter ils stadis ch'èn situads per lung da l'En (Svizra, Austria e Germania).



Communicaziun a las medias • **20210729\_Communicaziun a las medias\_MoVe\_INN\_now**

Da la partida ad in'etappa dal di è er Ulrich Seewer, vicedirectur da l'Uffizi federal da svilup dal territori: «Il project cumbinescha l'educaziun ambientala cun la mobilitad persistenta, in tema central da noss uffizi. Jau ma legrel d'aventuras interessantas cun la gruppa.»

A San Niclà surdattan las ciclistas ed ils ciclists da l'Engiadina il bastun da staffetta a la gruppa tirolaisa, che cuntinuescha il viadi fin a Puntina. La terza etappa maina ina gruppa bavaraisa dad Altötting fin a Passau. Il project per lung da l'En duess vegnir extendì l'onn proxim sin ulteriurs flums alpins en tut ils stadis da las Alps.

Link: [MoVe INN now – Umweltbildung entlang des Inns \(admin.ch\)](#)

Contact/dumondas:

Karin Augsburgger,

collavuratura scientifica, Fatgs internaziunals, Uffizi federal da svilup dal territori (ARE)

+41 58 484 92 62, [karin.augsburger@are.admin.ch](mailto:karin.augsburger@are.admin.ch)